



MEĐUNARODNI FOTO KONKURS "JEDAN SLIV – 1000 PRIČA O VODAMA"

Međunarodna komisija za sliv rijeke Save, obilježavajući 1. jun Dan rijeke Save, raspisuje foto konkurs na temu **"JEDAN SLIV – 1000 PRIČA O VODAMA"**.

Tema konkursa je široko koncipirana, kako bi se na sveobuhvatan način međunarodnoj publici prikazale rijeke, jezera, močvarna područja i s njima povezane prirodne ljepote, biološka raznolikost, kulturno historijska baština i životi ljudi u slivu Save.

Sliv rijeke Save, sa svojom izvanrednom biološkom i pejzažnom raznolikošću, jedan je od najznačajnijih slivova Jugoistočne Evrope. Dom za više od 8 miliona ljudi, sliv se proteže na teritorije 6 zemalja, Sloveniju, Hrvatsku, Bosnu i Hercegovinu, Srbiju, Crnu Goru i mali dio sjeverne Albanije.

Život ljudi u slivu rijeke Save i mnoge društvene aktivnosti ovise o vodama. Također vode i njihovo okruženje predstavljaju stanište za mnoge zaštićene i druge važne biljne i životinjske vrste, koje obogaćuju život u slivu i čine sliv rijeke Save „krunskim draguljem“ evropske prirode. Istovremeno, prekomjerno korištenje vodnih resursa u slivu Save za snabdijevanje vodom, proizvodnju hidroenergije, poljoprivredu, plovidbu i druge ljudske aktivnosti zajedno sa sve češćim klimatskim šokovima mogu uzrokovati krizu vezanu za vode (suše, zagađenje, poplave) koju vidimo u mnogim krajevima svijeta.

U skladu sa sloganom „Budi promjena koju želiš vidjeti u svijetu“ Svjetskog dana voda 2023. godine, koji poziva na ubrzavanje promjena u odgovoru na krizu voda i promoviše njihovo održivo korištenje u 21. vijeku, cilj konkursa je u čitavom procesu zaštite i očuvanja voda kao dragocjenog zajedničkog resursa, istaći važnost svakog pojedinca i njegove autentične priče.

PRAVILA FOTO KONKURSA

1. Organizator konkursa

Konkurs organizuje Međunarodna komisija za sliv rijeke Save (Savska komisija).

Savska komisija uspostavljena je Okvirnim sporazumom o slivu rijeke Save (Okvirni sporazum) čije su potpisnice: Bosna i Hercegovina, Republika Hrvatska, Republika Slovenija i Republika Srbija. Mandat i odgovornosti Savske komisije odražavaju ambiciozni pristup država Strana u cilju efikasnog provođenja navedenog Okvirnog sporazuma čiji su glavni ciljevi: uspostavljanje međunarodnog režima plovidbe rijekom Savom i njenim plovnim pritokama, uspostavljanje održivog upravljanja vodama te preduzimanje mjera za sprečavanje ili ograničavanje opasnosti, za smanjivanje i uklanjanje štetnih posljedica, uključujući posljedice poplava, leda, suša i slučajeva ispuštanja materija opasnih za vodu.

2. Tema

Tema foto konkursa je "**JEDAN SLIV – 1000 PRIČA O VODAMA**".

Kroz fotografije je potrebno ispričati jednu od priča, uhvatiti trenutak u vremenu i pružiti jedinstven lični doživljaj sliva rijeke Save, rijeka, jezera, močvarnih područja i sa njima povezanim prirodnim ljepotama, biološkom raznolikošću, kulturno historijskom baštinom i životima ljudi.

Fotografije trebaju prikazati posebnosti i ljepote sliva Save koje želimo sačuvati, kao i izazove s kojima se suočavamo u zaštiti zajedničkog izuzetno vrijednog resursa - svih voda u slivu rijeke Save. Također fotografije trebaju predstaviti prednosti i izazove života s vodama, pored voda ili na vodama u slivu Save.

3. Uslov učestvovanja na konkursu

Sve prijavljene fotografije moraju biti snimljene na području sliva rijeke Save.

Pravo učestvovanja na konkursu imaju profesionalni fotografi i amateri, bez ikakvih ograničenja.

Učesnici se prijavljuju popunjavanjem Obrasca za prijavu, čime automatski prihvataju uslove konkursa.

4. Prijavljivanje na konkurs

Prijava treba sadržavati od 1 do maksimalno 10 fotografija po takmičaru, te potpuno ispunjenu online prijavnicu. Svaki takmičar ima pravo na samo jednu prijavu.

Prijavljene fotografije potrebno je dostaviti u digitalnom obliku, u jednoj komprimiranoj datoteci (.ZIP format datoteke) pod nazivom "PrezimeIme_PhotoContest2023" (npr. JankovicJanko_PhotoContest2023.zip). ZIP datoteku potrebno je učitati putem pratećeg alata u okviru obrasca za prijavu.

Naziv svake fotografije treba sadržavati prezime i ime autora, redni broj fotografije, naslov fotografije, lokaciju, kao i mjesec i godinu kada je fotografija snimljena "PrezimeIme_No_Title_Lokacija_MM_YY" (npr. JankovićJanko_1_Buđenje Save_Lonjsko polje_07_2023).

Fotografije i ispunjenu online prijavnicu potrebno je dostaviti najkasnije do 15. septembra 2023.

5. Zahtjevi u pogledu fotografija

Fotografije ne smiju sadržavati nasilje i vulgarnosti niti direktne napade na pojedince ili organizacije. Sve prijave čije se fotografije smatraju uvredljivima bit će odmah diskvalificirane.

Fotografije mogu biti u boji ili monohromatske, potrebno ih je dostaviti u **JPEG formatu** s minimalnom dimenzijom uzdužne stranice od **1920 piksela** i minimalnom rezolucijom od **300 piksel/inč**, a veličina svake fotografije ne smije biti veća od **7 MB**.

Fotografije moraju biti autorsko djelo takmičara, bez intervencija u vidu montaže ili grafičke obrade koje bi mogle promijeniti kompoziciju i elemente (fotomontaža, te fotomanipulacija i korištenje generativnih AI tehnologija nije dopušteno). Fotografije snimljene filmskom kamerom, *fisheye* objektivom i fotografije spojene u panoramu ne ispunjavaju uvjete konkursa. Naknadna obrada slike ograničena je na prilagođenje ekspozicije, kontrasta, ravnoteže bijele boje kao i na umjerenu upotrebu HDR-a.

6. Ocjenjivanje fotografija

Pri odabiru najboljih fotografija, ocjenjivački žiri uzimajući u obzir temu konkursa, vrednovat će kreativnost, originalnost, inovativnost i kvalitet fotografije.

7. Nagrade

- nagrada autoru najbolje fotografije iznosi **900,00 EUR**,
- nagrada za drugo mjesto je **500,00 EUR**, a
- za treće mesto će biti izabrane tri fotografije čiji će autori dobiti nagrade u iznosu od po **200,00 EUR**.

8. Objava rezultata konkursa

Popis 5 nagrađenih fotografija biće objavljen sredinom oktobra 2023. na web stranici Savske komisije www.savacommission.org

9. Autorska prava, korištenje fotografija i odgovornost

Savska komisija ne preuzima nikakvu odgovornost za bilo kakve sporove vezane uz vlasništvo, odnosno za autorska prava nad fotografijama koje sudionici pošalju Savskoj komisiji radi učestvovanja na Konkursu.

U slučaju da učesnici Konkursa pošalju fotografije, a da nad istima nisu nosioci autorskog prava ili na drugi način zloupotrijebe tuđa prava, Savska komisija za takav slučaj ne snosi nikakvu odgovornost.

Autorska i srodna prava pripadaju učesnicima. Savska komisija stiče pravo trajnog korištenja fotografija prijavljenih u okviru Konkursa u neprofitabilne svrhe i bez plaćanja naknade autoru.

Savska komisija se obavezuje prilikom korištenja fotografija navoditi autora fotografije.

Od svih pristiglih radova, 60 izabranih fotografija bit će objavljeno (s potpisom autora) na službenoj internet stranici Savske komisije.

10. Osoba za kontakt

Za više informacija o foto konkursu možete se obratiti Ani Marinić (tel. +38514886960, e-mail: isrbc@savacommission.org) u Sekretarijatu Savske komisije.